

La confederaziun vul dar in bun exempel

Ils manaschis da la confederaziun vulan spargnar energia

■ (sda/anr) Ina da las finamiras areguard la strategia d'energia è da sminuir il consum d'energia. L'administraziun ed ils manaschis da la confederaziun sco la viafier federala duain ir cun bun exempel ordavant. Els han suttascrit ier ina declaraziun ensemen cun la ministra d'energia Doris Leuthard.

La declaraziun cuntogna l'intenziun d'augmentar l'effizienz d'energia fin il 2020 per 25 pertschient cumpareglia cun il stan da 2006. Mesiras datti tranter auter en ils bajetgs: Ins vul duvrar be pli glischs effizientas. Era pertutgant mobilitad datti potezial da spargnar. Collavuratur duain pudair lavurar dapli a chasa e survegnir impuls da nizegiar il traffic public.

Sper Leuthard han era suttascrit ils schefs da la viafier federala, da la posta, da la swisscom, da skyguide ed il president da la scola politecnica federala. Ensemen consummeschan quests manaschis radund 2 pertschient da l'energia che vegn duvrada en Svizra.

La viafier federala aveva gia gi communitgà ch'ella veglia laschar ir ils trens mo pli cun current ord fontaunas regenerablas e duvrar negina energia atomara pli. Ins vul guidar en l'avegnir ils trens a moda pli spargnusa, cun vaguns pli effizients ed uschia duvrar en tut 600 uras gigawatt pli pauc - quai fa ora in tschingavel dal consum annual ch'ins calculescha per il 2025.

La posta ha en senn da spargnar ener-



Ensemen cun cussegliera federala Doris Leuthard han differents manaschis da la confederaziun suttascrit ina declaraziun da spargnar energia.

KEYSTONE

gia cun duvrar auters vehichels sco rud-laders electronics. Plinavant vulan ins

planisar meglier las rutas dals postins. La swisscom spetga ina meglra bilantscha

d'energia cun il nov center da datas a Bern-Wankdorf.